

Pelajar PKT cemerlang sukan badminton

Oleh : Nooraini Che Aziz (PRO)

KUALA TERENGGANU – Seorang atlet badminton Politeknik Kuala Terengganu (PKT) telah berjaya mengharumkan nama PKT apabila tercalon bagi Anugerah Olahragawan Harapan sempena Majlis Anugerah Kecemerlangan Sukan Politeknik Malaysia (polySEA) 2016 yang berlangsung di salah sebuah hotel terkemuka di Kuala Lumpur baru-baru ini.

Nur Syawal Bin Mat Desa (21), pelajar semester 4 bagi jurusan Diploma Kejuruteraan Elektrik & Elektronik ini juga berjaya membawa pulang pingat emas bagi acara badminton sempena Kejohanan Karnival Sukan Politeknik (MSP) 2017 dan sekali gus dinobatkan sebagai Atlet Terbaik Sukan Badminton.

Anak ke-4 daripada sembilan beradik ini begitu menyerlah dengan senarai kecemerlangan dalam sukan badminton bagi kejohanan di peringkat kebangsaan dan antarabangsa. Syawal pernah mewakili Malaysia dan negeri Terengganu dalam sukan badminton sempena Asean University Games (AUG) 2016 dan Sukan Malaysia (SUKMA) 2016. Beliau juga pernah mewakili Politeknik Malaysia dalam Sukan Institusi Pendidikan Tinggi (SUKIPT) 2016 dan berjaya merangkul Naib Johan Perseorangan Lelaki.

Minat yang mendalam dalam sukan badminton ini bermula daripada ayahnya yang telah mula melatih anak-anaknya untuk bermain badminton sejak berumur 6 tahun lagi. Sokongan dan dorongan yang berterusan daripada keluarga dan rakan-rakan menjadi penguat semangat kepadanya untuk terus mencipta kejayaan dalam sukan ini.

Pn. Radiah Che Su, Pengarah Politeknik Kuala Terengganu dalam Perhimpunan Bulanan PKT baru-baru ini turut berbangga dengan pencapaian yang telah diperolehi oleh Syawal. Beliau turut menyampaikan sedikit penghargaan dan sumbangan kepada Syawal atas kejayaan yang telah diraih.

Semangat kesukanan yang tinggi dalam diri pelajar ini patut menjadi ikutan para remaja masa kini.



Nur Syawal Bin Mat Desa (kanan) bergambar bersama Pengarah PKT, Pn. Radiah Che Su dan pensyarah PKT di Majlis Anugerah Kecemerlangan Sukan Politeknik Malaysia (polySEA) 2016.



En.Shabudin bin Man, Timbalan Ketua Pengarah (Strategik), Jabatan Pendidikan Politeknik menyampaikan sumbangan kepada Syawal sempena Perhimpunan Bulanan PKT pada 15 Mei yang lalu.